

मार्निंग डोगरी न्यूज़ बुलेटिन, सभें. **09-20** Hrs

<><><><><><>

### Headlines

- भारती सेना दे फौजी कारवाइएं सरबंधी महानिदेशक डीजीएमओ हुंदे मूजब पाकिस्तान ते पाकिस्तान दे नजैज कब्जे आले कश्मीर च 100 शा मते आतंकवादिएं ते महत्वै आले लक्ष्यें गी तबाह कीता गेआ।
- लैफ्टिनेंट जनरल राजीव घई होरें आखेआ जे भारत ते पाकिस्तान दे डजीएमओ अज्ज दपैहरी 12 बजे गल्लबात करगंन ते कीती गेदी सैहमति गी लम्मे अरसे तगर बधाने दे तौर तरीके तैह करगंन।
- अज्ज दुनिया भरै च भगवान बुद्धे हुंदे अवतरण ध्याड़ा बुद्ध पुर्णिमा दे तौर पर मनाया जा'रदा ऐ। राश्ट्रपति, उपराश्ट्रपति होरें अपनियां शुभकामनां भेंट कीतियां।
- जम्मू श्रीनगर राश्ट्रीय जरनैली शिड़क एनएच-44 रामबन जिले च मरोग थाहर शिड़क बौहने करी बंद करी दित्ती गई ऐ।

<><><><><><>

### DGMO Briefing

भारतीय सेना दे फौजी कारवाइएं सरबंधी महानिदेशक डीजीएमओ लैफ्टिनेंट जनरल राजीव घई होरें आखेआ ऐ जे आपरेशन सिंदूर दे तैह्त पाकिस्तान ते पाकिस्तान दे नजैज कब्जे आले जम्मू कश्मीर च 9एं आतंकी ठकाने पर हमले कीते गे। इनें हमलें च 100 कोला मते आतंकवादी मारे गे। कल नमीं दिल्ली च समाचार माध्यमें गी जानकारी दिंदे होई डीजीएमओ होरें आखेआ ऐ जे इनें आतंकवादिएं च यूसूफ अजहा, अब्दुल मलिक रऊफ ते मुदासिर अहमद जनेह् आतंकवादी शामिल हे। उनें आखेआ जे आपरेशन सिंदूर दी अवधारणा आतंकवाद दे अपराधिएं ते योजना बनाने आलें गी सजा देने ते उंदे आतंकी ढांचे गी तबाह करने दे मकसद कन्नै कीती गई ही। राजीव घई होरें आखेआ ऐ जे भारत ते पाकिस्तान दे डीजीएमओ नै अज्ज दपैहरी 12 बजे गल्लबात करने दा फैसला कीता ऐ तां जे इस सैहमति गी लम्मे सभें तोड़ी बनाई रखने दे तौर मरीके पर सोच बचार कीता जाई सकै। उनें एह जानकारी दित्ती जे सेना प्रमुख जनरल उपेन्द्र द्विवेदी होरें पाकिस्तान आस्सेआ कुसै बी खलाफवर्जी दे मामले च जवाबी कारवाई लेई फौज दे कमांडो गी पूरा अधिकार दित्ते दा ऐ।

डीजीएमओ होरें आखेआ जे 7 कोला 10 मई बश्कार कब्जा रेखा पर तोपखाने ते जौहके थेआरें कन्नै गोलीबारी च पाकिस्तानी फौज दे तकरीबन 35–40 कर्मि मारे गे। एयर मार्शल भारती होरें आखेआ जे जित्थें नुक्सान पजाया जाई सकदा हा उत्थें हमला करने दा फैसला कीता गेआ ते भारतीय वायु सेना नै पाकिस्तान दे ब्हाई ठकाने, कमांड सेंटरें, फौजी बुनियादी ढांचे ते वायु रक्षा सरिस्तें पर हमला कीता गेआ। भारती सेना नै आखेआ ऐ जे जम्मू कश्मीर ते अंतर्राष्ट्रीय बनने उप्पर रातीं शांति बनी दी रेई। फौज नै दज़स्सेआ ऐ जे एल्लै तोड़ी कुसै घटना दी कोई सूचना नेई ऐ। फौज नै गलाया जे हाल दे दिनें च एह पैहली शांत रात ही।

<><><><><><>

#### Army-Border

भारतीय सेना नै आखेआ ऐ जे जम्मू कश्मीर ते अंतर्राष्ट्रीय बन्ने कन्नै लगदे होर दुए इलाके च रात काफी हद्द तोड़ी शांतिपूर्ण रेई। सेना नै आखेआ जे कुसै चाल्ली दी बी घटना दी कोई सूचना नेई ऐ, जेहड़ी हाल दे दिनें दी पैहली रात ही।

<><><><><><>

#### LG-Visit

उपराज्यपाल मनोज सिन्हा होरें कल जम्मू दे सरकारी मैडिकल कालेज अस्पताले दा दौरा लाइयै पाकिस्तान आस्सेआ कीती गेदी गोलाबारी च घायल जम्मू राजौरी ते पुंछ दे लोकें दी डौल पुच्छी। डाक्टरें दी इक टीम नै उपराज्यपाल होरें गी घायलें दी हालत बारे दस्सेआ। उपराज्यपाल होरें अस्पताल प्रशासन गी निर्देश दित्ते जे ओ इनें गी बेहतर थमां बेहतर मैडिकल सहूलत ते इलाज मुहैया करोआन। उनें घायलें दे तौले शा तौले नरोआ होने दी प्रार्थना कीती ते प्रभावत परोआरें गी हर मुमकन सहायता देने दा भरोसा दोआया।

<><><><><><>

#### LG-Dy CM WLC

जम्मू कश्मीर दे उपराज्यपाल मनोज सिन्हा ते उपमुख्यमंत्री सुरिन्दर चौधरी होरें बीएसएफ दे सब इंस्पेक्टर मोहम्मद इम्तेयाज हुंदे श्रद्धांजलि समारोह च शामिल होए। ध्यानलोग ऐ जे इम्तेयाज होरें बन्ने पार थमां कीते गेदी गोलीबारी च सर्वोच्च बलिदान दित्ता हा। मंत्री सतीश शर्मा, बीएसएफ दे महानिदेशक जम्मू फ्रंटियर शशांक आनंद, जम्मू दे डिवीजनल कमीशनर रमेश कुमार ते जम्मू दे पुलस महानिदेशक भीम सेन टूटी हुंदे सनें बीएसएफ, पुलस ते सिविल प्रशासन दे आला अफसर बी शहीद अफसरें गी श्रद्धांजलि देने लेई उत्थें मजूद हे।

उपराज्यपाल होरें आखेआ जे ओ बीएसएफ दे दिलेर अफसर दे सर्वोच्च बलिदान गी सलाम करदे न ते उंदे पराक्रम ते बलिदान गी कदे नेई भुलेआ जाई सकोग। श्री सिन्हा होरें गलाया जे दुखे दी इस घड़ी च समूलचा देश शहीद दे परोआर कन्नै खड़ोते दा ऐ।

<><><><><><>

Karan Singh-Indo Pak

कांग्रेस लीडर डॉ. करण सिंह होरें कल भारत पाकिस्तान बश्कार होई दी सैहमति दा सुआगत कीता ते जम्मू कश्मीर च बन्ने पारां होई दी शैलिंग च प्रभावत होए दे लोकें गी मुनासब राहत सहायता दित्ती जा। उनें आखेआ जे प्रधानमंत्री नरेन्द्र मोदी होरें बड़ी समझदारी कन्नै सैन्य बलें गी आपरेशन सिंदूर तोड़ चाढ़ने दी खुल्ल दित्ती। उनें एहदे लेई प्रधानमंत्री ते सशस्त्र बलें गी मुबारकबाद दित्ती। भारत ते पाकिस्तान नै जंदे शनिवारें एह सैहमति कीती ही जे ओ जिमीं, ब्हाई ते समुंद्रै थमां सब्बै सैन्य कारवाइएं ते गोलाबारी फौरी तौरा पर रोकी देंगन।

<><><><><><>

Jaishankar

विदेश मंत्री डॉ. एस.जयशंकर होरें मिस्र दे विदेश मंत्री बद अब्देलअती हुंदे कन्नै फोन पर गल्लबात कीती ऐ। डॉ. जयशंकर होरें इक सोशल मीडिया पोस्ट च दस्सेआ जे उनें मिस्र दे विदेशमंत्री होरें गी हाल दी घटनाएं बारे जानकारी दित्ती ते कुसै बी चाल्ली दे आतंकवाद खलाफ उक्का बी बर्दाश्त नेई करने आली नीति अपनाने दे महत्वै पर जोर पाया। दौनें लीडरें भारत ते मिस्र बश्कार आर्थिक सैहयोग दी संभावनाएं पर गल्लबात कीती।

<><><><><><>

Budh Purnima

अज्ज बुद्ध पुर्णिमा मनाई जा करदी ऐ। अज्जै दे दिन गौतम बुद्ध हुंदा जन्म होआ हा, कन्नै गै उनेंगी बोधगया च महाबोधी दरख्त हेठ निर्वाण दी प्राप्ती होई ही। बुद्ध पूर्णिमा भारत, नेपाल, भूटान, बर्मा, थाईलैंड, तिब्बत, कोरिया, मंगोलिया, वियतनाम, कंबोडिया, सिंगापुर, इंडोनेशिया ते श्रीलंका दे बौद्धें ते हिंदुएं दा इक मुख् ध्यार ऐ।

<><><><><><>

## President Greetings

राष्ट्रपति द्रौपदी मुर्मू होरें बुद्ध पूर्णिमा दे मौके पर देशवासिएं ते दुनिया भरे च भगवान बुद्ध गी मन्नने आलें गी शुभकामनां दित्तियां न। अपने सनेए च राष्ट्रपति होरें आखेआ जे दया दे प्रतीक भगवान बुद्ध हुंदे आस्सेआ दित्ता गेदा अहिंसा, हिर्ख—प्रेम ते दया दा सनेया मनुक्खी जात दे कल्याण दा मूल आधार ऐ। उनें गलाया जे भगवान बुद्ध दे आदर्श, बरोबरी, सद्भाव ते समाजी न्याह दे शश्वत मुलें साढ़े कुसा भरोसे गी बघाया। राष्ट्रपति होरें कामना कीती जे लोक अपने जीवन च भगवान बुद्ध हुंदे आदर्श गी अपनान ते इक शांतिपूर्ण ते विकसित राष्ट्र दे निर्माण च अपना योगदान देन। उपराष्ट्रपति जगदीप धनखड़ होरें बर बुद्ध पूर्णिमा दे मोके पर लोकें गी शुभकामनां दित्तियां न। अपने सनेए च उनें गलाया जे एह पवित्र ध्यार भगवान बुद्ध हुंदे जन्म, ज्ञान प्राप्ति दा प्रतीक ऐ। श्री धनखड़ होरें आखेआ भगवान बुद्ध हुंदा अहिंसा, दया ते मध्य भागें दा सेनेआ अज्जै दा दुनिया च पैहले शा बी बद्ध महत्व रखदा ऐ ते उंदियां सिक्खेया चुनौतीपूर्ण समें च ध्रुव तारे आला लेखा ऐ।

<><><><><><>

## NHW-Ramban

जम्मू श्रीनगर राष्ट्री जरनैली शिड़क एनएच-44 रामबन जिलेदे मरोग इलाके च शिड़कें दे बेई जाने करियै गड़िडएं दी आओजाई लेई बंद ऐ। उआं मरम्मत दा कम्म चला'रदा ऐ पर लोकें गी सलाहदित्ती जंदी ऐ जे ओ मरम्मती कम्म पूरा होने तगर जम्मू श्रीनगर राष्ट्री जरनैली शिड़के पर सफर नेइं करन।

<><><><><><>

## DC Poonch Visit

पुंछ दे डिप्टी कमीशनर विकास कुंडल होरें कल इलाकेदिएं ओकिएं थाहरें दा दौरा कीता जेड़ियां बन्ने पारा थमां होई दी गोलीबारी च प्रभावत होई दियां न। जिला प्रशासन दे वरिष्ठ अधिकारी बी उंदे कन्नै मजूद हे। डिप्टी कमीशनर होरें मोहल्ला काजी मोहरा, मोहल्ला डंगुस, मोहल्ला सराई, जिला पुलस लाईस, जिला अदालत अहाता, जामिया जिया-उल-उलूम मोहल्ला, गीता भवन, मोहल्ला कमसर, मोहल्ला रेडियो स्टेशन, गुरुद्वारा सिंह सभा ते मोहल्ला कामा खान दा दौरा लाया ते मकामी बसनीकें कन्नै गल्लबात करियै जमीनी स्थिति दा जायजा लेआ ऐ। उनें सरबंधत अधिकारिएं गी ताकीद कीती जे ओ जायदाद गी पुज्जे दे नुक्सान दा ब्योरेवार जायजा लेइयै व्यापक रिपोर्ट जमा करोआन। प्रशासन नै प्रभावत बसनीकें गी भरोसा दोआया जे उंदी हर मुमकन मदाद कीती जाग।

<><><><><><>